



IKINYAMAKURU K'IMIHINDAGURIKIRE Y'IKIRERE N° 28, KIGENEWE

ABAHINZI- BOROZI IGICE CYA MBERE UKWAKIRA (01- 10), 2020

Cyasohtse ku itariki ya 12 Ukwakira 2020

Incamake

Mu minsi icumi y'igice cya mbere, Ukwakira 2020 kuva tariki ya 01 kugeza tariki ya 10, byagaragaye ko isangano ry'imiyaga riri mu karere u Rwanda ruherereyemo, ibi byatumye imvura iboneka ahenshi mu gihugu. Imvura iri muni y'ikigereranyo cy'impuzandengo y'imvura isanzwe igwa yapimwe ahenshi mu gihugu. Igiteranyo cy'imvura nyinshi yapimwe mu Ntara y'Iburengerazuba ku bupimiro bwa Ntendezi ahapimwe milimetero 98.5 mu minsi irindwi, Nyamagabe hapimwe milimetero 59.6 mu minsi itanu naho ku bupimiro bwa Kirimbi hapimwe milimetero 58.6 mu minsi irindwi. Ahapimwe imvura nke iri muni ya milimetero 10 ni ku bupimiro bwo mu Ntara y'Amajyepfo ku bupimiro bwa Byimana, Kansi, Nyakibanda, Rubona na Save.


Ibipimo by'ubushyuhe ni nk'ibisanzwe mu gice cya mbere cy'Ukwakira, aho igipimo cy'ubushyuhe bwo hejuru cyari hagati ya dogere Selisiyusi (°C) 21.3 muri Gicumbi ndetse na dogere Selisiyusi 31.6°C muri Rusizi ku bupimiro bwa Bugarama naho igipimo cy'ubushyuhe bwo hasi cyari hagati ya 11.0°C muri Musanze ku bupimiro bwa Busogo na 19.1°C ku bupimiro bwa Bugarama. Ubuhehere bw'ubutaka bwariyongereye bituma imirimo y'ubuhinzi n'ubworozi ikomeza mu gihugu hose.

1.0. Imvura yaguye

Aha turerekana ingano y'imvura yaguye, umubare w'iminsi imvura yaguye n'ubuhere bw'ubutaka mu minsi icumi y'igice cya mbere cy'Ukwakira 2020.

1.1. Ingano y'imvura yaguye

Ikarita ya mbere hasi irekama ingano y'imvura yaguye mu minsi icumi y'igice cya mbere cy'Ukwakira 2020. Muri iki gice cya mbere imvura yapimwe yari muni y'impuzandengo y'imvura isanzwe igwa ahenshi mu gihugu. Igiteranyo cy'imvura ingana na milimetero 98.5 yapimwe ku bupimiro bwa Ntendezi mu minsi irindwi ikaba ari nayo yari nyinshi, naho iyabaye nke cyane yari muni ya milimetero 4.5, ikaba yarabonetse ku bupimiro bwa Save.




Ikarita ya 1: Ingano y'Imvura yaguye mu gice cya mbere cy'Ukwakira 2020

1.2 Impuzandengo y'imvura isanzwe igwa mu minsi icumi y'igice cya mbere cy'Ukwakira

Ufatiye ku bipimo by'igihe kirekire, ikarita ya kabiri iratwerekana imvura isanzwe igwa mu minsi icumi y'igice cya mbere cy'Ukwakira. Ubusanzwe iki gice kigusha imvura iri hagati ya milimetero 14.8 na milimetero 74;

bigaragara ko ugereranyije imvura yaguye n'isanzwe igwa mu gihe kirekire, imvura yabaye nke mu bice byinshi by'igihugu cyane cyane mu ntara y'Amajyepfo naho agace k'amajyepfo y'Akarere ka Nyamasheke akaba ariko kaguyemo imvura iruta isanzwe ihagwa.




Ikarita ya 2: Imvura isanzwe igwa mu gice cya mbere cy'ukwezi kw' Ukwakira

1.3. Umubare w'iminsi imvura yaguyemo

Ikarita ya 3 iragaragaza umubare w'iminsi imvura yaguyemo, mu gice cya mbere mu kwezi kw'Ukwakira 2020. Umunsi tubara ko wagushije imvura ni uwapimweho byibuze milimetero 0.85 cyangwa nyinshi.

Muri iki gice nibura ahantu henshi hagushije imvura hagati y'iminsi itatu n'iminsi umunani uretse ku bupimiro bwo mu Ntara y'Amajyepfo n'Iburasirazuba haguye imvura mu minsi iri muni y'itatu.



Ikarita ya 3: Umubare w'iminsi imvura yaguyemo

1.4 Ubuhehere bw'Ubutaka

Aha turagaragaza muri rusange uko ubuhehere bw'ubutaka bwari bumeze. Ahenshi mu gihugu ubuhehere bw'ubutaka muri iyi minsi icumi y'igice cya mbere cy'Ukwakira 2020 bwari mukigereranyo gisanzwe bitewe n'ibihe by'imvura ndetse n'ibicu byiganje byaranze iyi minsi. Hateganyijwe ko ubuhehere bw'ubutaka buzakomeza kwiyongera mu gice cya kabiri cy'Ukwakira bitewe n'uko ibihe by'imvura biteganyijwe kwiyongera.


2.0. Iyipimo by'ubushyuhe

Aha turareba muri rusange uko ibipimo by'ubushyuhe bwo hejuru no hasi hirya no hino mu gihugu byari bimeze.

2.1 Iyipimo cy'ubushyuhe bwo hejuru

Ikarita ya 4 irerekana ubushyuhe bwo hejuru. Ugendeye ku bipimo by'ubushyuhe dusanzwe dupima, ahenshi mu gihugu ubushyuhe bwari mu kigereranyo cy'impuzandengo y'igihe kirekire; mu Ntara y'Iburasirazuba, mu Mujyi wa Kigali, ndetse n'igice kinini cy'Iburengerazuba cyane cyane mu Majyepfo yaho niho hashyushye kurusha ahandi. Mu Ntara y'Amajyaruguru, iy'Amajyepfo n'igice kinini cy'Intara y'Iburengerazuba akaba ariho


hakonje ugereranyije n'ahandi mu gihugu. Iyipimo by'ubushyuhe byari hagati ya dogere Selisiyusi 21.3 na 28.9 ahenshi mu gihugu; uretse ku bupimiro bwa Nyagahanga bapimye dogere selisiyusi 29.8 no ku bupimiro bwa Bugarama hashyushye cyane hapimwe dogere selisiyusi 31.6.



Ikarita ya 4: Ubushyuhe bwo hejuru

2.2. Iyipimo cy'ubushyuhe bwo hasi

Ikarita ya gatanu irerekana uko ubushyuhe bwo hasi bwanganaga. Ubushyuhe bwo hasi bwari hagati ya dogere Selisiyusi 11.0°C (Busogo) na dogere Selisiyusi 19.1°C ku bupimiro bwa Bugarama. Mu Majyaruguru y'uRwanda niho hakonje cyane kurusha ahandi mu gihugu.



Ikarita ya 5: Ubushyuhe bwo hasi


3.0 Iteganyagihe rigenewe abahinzi mu minsi icumi y'igice cya kabiri cy'Ukwakira (tariki 11-20) 2020

3.1 Ikirere giteganyijwe

Mu gice cya Kabiri cy'ukwezi k'Ukwakira 2020 (hagati y'italiki ya 11 n'ya 20) mu Rwanda hateganyijwe imvura iri hagati ya milimetero 30 na 100 mm. Imvura iri hagati ya milimetero 30 na 60 iteganyijwe mu Ntara y'Iburasirazuba ikaziyongera uva mu burasirazuba uganu mu burengerazuba bw'iyi ntara. Imvura iri hagati ya milimetero 50 na 70 iteganyijwe mu Muji wa Kigali, imvura iri hagati ya milimetero 50 na milimetero 100 iteganyijwe mu Ntara y'Amajyepfo, imvura iri hagati ya milimetero 70 na milimetero 100 iteganyijwe mu Ntara y'Iburengerazuba naho imvura iri hagati ya milimetero 50 na 90 iteganyijwe mu Ntara y'Amajyaruguru.

Ku mataliki ya 12, 13 na 15 Ukwakira 2020 hateganyijwe ko imvura iziyongera ndetse ikaba nyinshi henshi mu turere twa Nyamagabe, Nyaruguru, Rusizi, Nyamasheke, Karongi, Rutsiro, Nyabihu, Rubavu, Musanze, Gakenke na Muhanga. Biteganyijwe ko iyi mvura izaba irimo umuyaga mwinshi ndetse izumvikanamo inkuba.

Biteganyijwe ko imvura izaturuka ku isangano ry'imiyaga rizongera umwuka uhehereye mu karere u Rwanda ruherereyemo. Iminsi imvura izagwa izaba iri hagati y'iminsi itatu (3) n'iminsi itandatu (6) bitewe n'ahantu, iminsi mike izaboneka mu gice cy'iburasirazuba n'igice cyo hagati mu gihugu. Imvura iteganyijwe hagati y'italiki ya 11 n'ya 20 Ukwakira 2020 iri hejuru gato y'impuzandengo y'imvura isanzwe igwa muri icyo gihe.



Ikarita ya 6: Iteganyagihe ry'imvura mu gice cya kabiri cy'Ukwakira 2020.

3.2 Ibirebana n'imirimo y'ubuhinzi

Inzego z'ubuhinzi ziragirwa inama yo kwihutisha imirimo yo gutegura imirima, kwihutisha kugeza inyongeramusaruro ku bahinzi, guterera ku gihe no gutegura ibikoresho byifashishwa mu mirimo yo kuhira cyane cyane mu bice bikunze kugira imvura idahagije ndetse no kwita ku mihingire ibika amazi mu butaka. Muri iki gice cya kabiri imirimo izibandwaho cyane ni iyo gutera imbuto zitandukanye. Abahinzi barashishikarizwa gukomeza kugisha inama abashinzwe ubuhinzi babegereye mu gukomeza gutegura neza imirimo ijyanye n'ubuhinzi. Barashishikarizwa kandi kujya basura urubuga rwa Meteo Rwanda www.meteorwanda.gov.rw, cg guhamagara umurongo utishyurwa 6080.